

西方確指



覺明妙行菩薩說
菩薩戒弟子常攝集





覺明妙行菩薩
菩薩戒弟子常攝

集說

西 方 確 指

◎ 佛教是佛陀對九法界眾生至善圓滿的教育。

◎ 釋迦四十九年所說的一切經，內容就是說明宇宙人生的真相。人生就是自己，宇宙就是我們生活的環境。

◎ 知覺名佛菩薩，不覺名凡夫。

◎ 修行就是將我們對宇宙人生錯誤的看法、想法、說法、做法，加以修正。

◎ 佛教的修行綱領是覺、正、淨——覺而不迷，正而不邪，淨而不染，並依戒、定、慧三學，以求達到此目標。

◎ 修學的基礎是三福，待人依六和，處世修六度，遵普賢願，歸心淨土，佛之教化能事畢矣。

出版聲明

- 一、本書係依據佛教出版社，一九七八年出版之《西方確指》，重新排版印製。
- 二、本會出版之一切書籍，免費結緣，禁止販售，歡迎翻印流通，但請勿增刪內容。如欲翻印此書，本會圖書組（amtb9@amtb.tw）可提供最新版本資料，或至「淨空法師專集網站」查詢下載。
- 三、諸位仁者若發現此書內容、文字有訛誤之處，尚祈不吝賜教為盼！

西方確指序

丁未夏（註一）。過雪山和尚方丈。和尚出一書。授余曰。此寶筏也。且緣起甚奇。明末時。吳城八友。同修玄門。日請乩仙以談其術。於卒也。有仙至。所談與諸仙異。因日事之。甚狎熟。久之。忽勸以念佛。眾問念佛可乎。曰。善。眾皆稱南無佛。曰。不如是念也。眾問如何。曰。汝須合掌至心。向西頂禮。念南無阿彌陀佛。眾從之。於是爲之微細開示念佛法門。令捨僞歸眞。求生極

樂。始宣示夙昔因緣。菩薩名號。及現異香天花種種靈瑞。而八人者。皆反其邪修。歸於正信。無朽者。八人中之師也。菩薩令往三昧和尚處受毘尼。圓僧相。和尚始難之。既而見菩薩月偈。遂敬禮西方。爲之剃度。蓋菩薩始至時。眾以爲仙。指月爲題。求句。因示以偈曰。

一月光含千世界 分身無量照群迷

當知本體原無二 不動莊嚴變化機

始於明崇禎癸未五月二十八日。迄清順治丁亥（註

二）十月初二日。前後共二十四會。所說皆修行要妙。因偈中有確指正修路句。遂名之曰西方確指。余讀之。身心踴躍。不啻醍醐之滴入焦腸也。因歎奇不已。和尚曰。余始亦不之信。既而閱之。神采煥發。即欲不信而不能矣。余曰。菩薩往昔因中。與八人具有大緣。悲念深故。權巧接引。此豈同於應乩之流。且觀菩薩臨行。有曰。鸞乩之設。本爲神鬼依憑。非大菩薩應化常事。則是書也。豈可作乩書視耶。余時即願刊布流通。廣利群有。而因緣未

到。迄今己酉春。僧俗道侶。無不踴躍歡喜。願施貲助成。至有讀而哭。哭而讀。頓捨所愛室宇衣服器具。入深山念佛者。豈非菩薩以無緣慈。攝化眾生。不可思議乎。遂與靈曦慧楫二老師。謀付諸梓。梓成。道其始末如此。

時康熙己酉（註三）九月既望

古吳淨業弟子朗西金鍔撰

目 次

西方確指	序	一
西方確指	後序	一
西方確指	九〇	一



西方確指

▼ 6



西方確指

覺明妙行菩薩說

菩薩戒弟子常攝集

◎一時菩薩自極樂國來。降於娑婆震旦古句吳地。在會弟子。以往昔因緣。得蒙化度。菩薩將顯淨土法門。而說偈言。

諸佛之法要 微密不思議
以非思議故 無能盡宣說

牟尼大慈父 悲憫眾生者
說所不能說 導彼今後世
更以異方便 顯示安樂刹
令發願往生 橫截諸惡趣
由佛阿彌陀 大願攝群品
聞名能受持 決定生無惑
若有大力人 專念心常一
成就深三昧 現前亦見佛



今我如佛教 將開化導門

念爾等迷倒 確指正修路

是非弱小緣 應具難遭想

西方萬億程 一念信即是

◎菩薩說偈已。令諸弟子朗宣一遍。復言。汝等向來

學宗玄術。心溺邪修。我以夙緣慈念深故。來此化導。今
已首標西方淨土。爲正向正修一門。猶慮未能極信。次當
說我名號及我所證。令知說是法者是大菩薩。善男子。我

昔因中。以妙湛覺心。照明一切諸所有刹土。眾生所同具足。即以覺妙妙覺。覺明妙心。起無量妙行。度諸眾生。是故阿彌陀佛印我名號。號曰覺明妙行。汝等從此皈依。更無疑二。時同會者八人。俱合掌至心。念南無覺明妙行菩薩。敬禮而起。菩薩曰。善哉。如是。

◎或問持經咒之法。菩薩曰。所謂持經咒者。自持其心也。要在直明心地。若止云持得熟。誦得多。又念某經某咒某佛。謂我有大功德。而不能句句銷歸自性。又不能

深解如來妙諦。謂可以獲果證者。不見十字路口。若無眼。若無足。若乞婦。若乞男。終日不住口念到夜。計其所持。一歲何啻數十萬遍。究竟是殘疾者。求乞者。並不曾證得一毫果在。此何以故。只無解無行故耳。故知持是經。即當依是經而修行。又發大願。或求生佛國。或求明心地。或發大智慧。或利濟眾生。俱仗如來廣大弘通之力。以成就行人之願。如是方爲持經持咒念佛。

◎天然老僧。以久病不癒。欲入徑山待死。投骨普同

塔中。菩薩曰。汝欲住山待死。是無事討事耳。汝愁幾根老骨頭沒處安頓耶。不知眼光落地。直伸兩腳。任他刀砍斧斫。火燒水浸。與爾無干。乃爲他作久遠計。亦太愚矣。且此身生時。尚是無益。何況死後。汝今宜簡省諸事。單持一句阿彌陀佛。念念不捨。阿彌陀佛便與汝爲好伴侶。大限到時。現身接引。得生極樂。豈不愈入山待死耶。又生老病死是世間難免之苦。汝即久病。亦莫管他癒不癒。但一心念佛。生也由他。死也由他便了。

◎僧不二。將投師受戒。菩薩曰。惜哉惜哉。堂堂相貌。表表儀形。不知自反。計其所作。與俗人無異。吾見汝身在此處。而神遊地獄矣。急宜痛加修省。斷惡遵善。

上求佛果。下化群生。不可昏昏昧昧。失此有限光陰。自貽萬劫之累。至受戒一事。不受則已。若一受。更不得分毫毀犯。當守護清淨。如白璧明珠。了無瑕玷。斯成戒品。蓋戒爲三世諸佛入道根本。勿同兒戲。又若住靜參方。更宜親近善友。遠諸庸劣。親善則道業易成。近惡則

戒行易失。此二語。終身學道之要。慎之記之。

◎馬永錫兄弟。夙世爲獵戶。一日入山。共殺一鹿。當獲短命報。又嘗見塔中佛像仆地。扶起安座。禮拜而出。以善因故。再得人身。菩薩先爲永錫開示已。永錫懼。求永年之道。菩薩曰。昔北方妙覺寺。有童子沙彌。年十六時。有一相師。說人生死。不爽毫髮。謂沙彌言。汝年十八季秋當死。沙彌恐甚。夜禱於佛。願於藏中賜經一卷。終身受持。以祈長壽。言已。悲泣不勝。再拜而

起。於大藏中。隨手取得《金剛般若經》。遂書寫受持。
曉夜無懈。兼持戒精嚴。了悟玄理。年未四十。道風流
播。四眾歸仰。後至八十坐化。即洛陽微行禪師也。爲唐
玄宗開元六年（註四）事。我所親見。汝今既怖短命。欲
求永命。當依此沙彌。求金剛善本。發心書寫。勤行讀
誦。復求解義趣。此內功德也。從今日始。不得更殺物
命。當愛如己身。又多積陰德。此外功德也。內外俱修。
功德甚大。自能與天合體。而天壽不二之理立矣。何慮年

壽之不永乎。然須慎終如始。如彼沙彌八十而不怠。方爲合道。切莫有頭無尾。或行十日半月。一年兩歲。便丢了也。若果盡形遵奉。先後無間。不遂所求。諸佛及我俱墮妄語。

◎菩薩示陳定嵩曰。汝父子奉行我教。最爲難得。但必持志久遠。不得便生感應希求之念。將修行二字。正如日用間穿衣喫飯之事。方可。

◎菩薩示查定宏母曰。汝夙有向道之念。而未遇正

人。深爲可憫。今當爲汝分別開示。汝往昔爲比丘時。力行精進。晝夜不怠。心猛烈故。於靜定中。忽起一見。云我何故不能速得成佛。又一日。聞諸佛無相。即心是佛之語。復益邪思。云既諸法空寂。我心是佛。何用修習。不知此爲究竟空理。而非初入法界所易言者。比丘從此竟墮邪見。不復進修。自謂已證大道。所以從迷入迷。沉淪長夜。悲哉眾生。求道不遇眞善知識。未免陷於羅網。不慎。汝今當知。由昔以見邪故。報獲五漏。失正知故。

復遇邪師。毒蟻親遭。豈得不生恐怖。今應速發正信。至心憶念阿彌陀佛。求生極樂國土。

◎無朽爲一友問。得壽幾何。菩薩示偈曰。

人命如朝露 虛浮無定期

未能逃夢幻 何必預求知

復示曰。且莫爲他問日期。到臘月三十日。管取手忙腳亂在。（是友果以次年臘月三十日疾終。）無朽聞說。遂求開示。菩薩曰。元柏當知。學道而不明此心。譬如造

屋無基。渡水無筏。欲明心者。當微細觀究。此身此心。
從何而有。既四大虛幻。心將誰寄。身心既幻。世界微
塵。了無差別。目前萬法。從何處生。從何處滅。若無生
滅。則能照所照。兩無所依。自見真如寂滅場地。

◎句曲孔生。持齋二十年矣。自念衰老。問死後云
何。因泣下不已。菩薩曰。不須悲淚。但從我說。深信遵
行。自有好處安身在。遂授偈曰。

西方有淨土 人天皆所依

汝能修此門 安隱無驚疑

◎沈文州。以傷寒名家。適至作禮。菩薩問曰。寒入心包。當作何病。答曰。名中寒。因喻諸人曰。汝等但知寒入心包。名曰中寒之疾。若邪入於心。即爲殞命之病矣。汝諸人但以身病爲病。調之治之。至於心有大病。則不問明醫。不求妙藥。任其患苦而莫之覺。哀哉。

◎陳大心。奉教念佛。極其誠至。菩薩示偈曰。

八德池中蓮已種 果然一念甚宏深

滋培雖藉如來力 長養全憑決定心

又喻諸人曰。此土有發願往生者。彼土即生蓮花。故作是語。汝等應生深信。

◎孫中白。好丹術。日久無效。因來會作禮。菩薩呵曰。老禿今日換這副嘴臉見我麼。且問爾。金丹幾時可成。答曰。正爾求成。菩薩曰。若成了。千萬留卻幾顆。莫都喫到肚子裡去。俟汝見閻羅老子時。好做些人事送送。痴老兒。此事決無你分。不如做你本等去。孫拜謝。

有頃。菩薩又曰。痴老兒。知得你自己本等麼。答曰。我求見性。是我本等。菩薩曰。汝知此性。爲大爲小。爲青爲黃。答曰。性無如是等相。菩薩曰。然則汝欲向甚處求見。孫無語。乃發信皈依。願爲弟子。求示法名。遂示以偈曰。

性無大小青黃相 那有聲名任汝呼
不達此中玄妙處 一言半字總淆訛

我今強爲汝立名。可曰達本。汝此後光陰。不上七八

年矣。莫負卻八百年前三十六載苦行也。孫因問此身如何結局。菩薩曰。結局便結局。又問如何結局耶。孫乃問如何修持。菩薩曰。淨土一門。能廣攝群品。汝問修持。當念阿彌陀佛。發願往生。便得一了百了。汝無再惑。

◎菩薩又喻諸人曰。從古大聖大賢闡微立教。皆至精至簡。上士聞而悟。中下聞而修。皆歸大道。乃後之著述。務爲繁言隱說。使凡流揣摩成見。遂至以訛傳訛。深入邪僻。抱暗沒世。竟不自覺。如達本因讀參同悟真諸

書。不知法要。曲信訛傳。謂爲有得。執吝不捨。白首無成。動諸煩惱。菩薩說爲眞可憫者。是故汝等既識前非。當崇正信。

◎一時菩薩將臨法會。弟子八人。無朽、常攝、常源、定茂、達本、查定宏、陳定嵒、查定敏。恭謹顥竚。齊唱佛號。忽聞異香。從空中來。眾皆歡喜。得未曾有。菩薩曰。善哉善哉。爾等知今日之會。有夙因否。昔梁武皇天監六年（註五）。我出家於北魏之東都淨因寺。爲大

比丘。因避亂南遊。住錫雞鳴山麓。時爾八人依我修學。

不久以兵亂各散。我越後二載。示寂於武林天竺。後復於唐僖宗朝（註六）。爲清河獻王長子。亦棄位出家。今爾八人同會念佛。亦由我發心。正如往昔無異。但爾等去我以來。八百餘年矣。仍復飄流未反。真爲可悲。真爲可痛。今爲汝等重加發明所修行業。令速成辦。早登解脫。宜各諦聽。

◎示無朽曰。汝向者雖從事玄門。而能恭敬諸佛。當

知即是夙因。今宜速發深心。精修淨業。爲諸人倡導。無空擲後此一十三年光景也。付汝偈言。

八百年前有勝緣 今來相遇指青天

已知本地中秋月 莫向長江覓渡船

◎示常攝曰。汝常持大悲神咒。云何而持。答曰。所持之咒。歷歷分明。能持之心。了不可得。菩薩曰。能如是持。是名真持。有偈囑汝。

汝持大悲咒 應識大悲心

離名亦離相 以此度群生

◎示常源曰。汝既出家。要須謙下柔和。敬事師長。
虛己請益。增長志氣。莫只坐雲霧中過日。源不達。復示
曰。汝夢夢若此。可曉得自己的心麼。源無語。乃令誦準
提咒一遍。源隨誦之。菩薩曰。此不是你心。喚作甚麼。
偈曰。

見初無心 即汝本心 準提一遍 全體分明

◎示定茂曰。汝持準提咒。平日須要細密用心。觀一

切境。若喧若寂。若物非物。若欣若厭。無非此咒現體。即我妙心刻刻流露。如是奉持。必獲果證。我亦以神力助汝成就。當誦我偈。

兩行祕密 即汝本心 莫謂法少 是法甚深

◎問達本曰。汝將云何。答曰。欲明心。菩薩曰。得無口頭話否。當勤念佛。其功十倍。亦示汝偈。

心外無佛 佛即汝心 深信不惑 一念無生

◎示查定宏曰。汝持《金剛般若》。當知有七不持。

所謂心昏散不持。有過犯不持。入不淨處後不持。飲酒後不持。人擾不清淨不持。有事將作未作不持。心別有記憶不持。若堅意受持。應離此七。誦至純熟。即於觀心中持之。果能如是。則功德不可思議。果報不可思議。佛有誠言。汝須保任。復與汝偈。

般若一經 功德無盡 拔妄想根 脱生死病

◎示陳定嵩曰。小人之爲惡也。惟恐人知。君子之爲善也。亦惟恐人知。汝當以君子慎道之心。而作佛事。更

有偈曰。

勿貴人知 勿希天應 恒一其心 必堅必正

◎示查定敏曰。汝未及弱冠。已知向道。可驗夙因。

今爲汝命名曰敏。敏有聰、勤、妙、捷四義。聰以除汝暗。勤以勵汝怠。妙以開汝慧。捷以發汝廢。汝當顧名思義。莫謂菩薩徒與爾一箇字也。復示汝偈。

汝年正幼 當學孝弟 以是持身 毋惰其志

◎是日陳大心後至。菩薩問曰。汝云何修持。答云。

惟修淨土。菩薩曰。捨此別無勝門矣。囑汝一偈。

道無他說。唯心而已。蓮胎始成。專精勿二。

◎菩薩曰。所示淨土一門。眞諸佛心宗。人天徑路。

今汝等雖求往生。若發願不切。如入海而不獲寶珠。徒勞無益也。我昔於晉明帝時（註七）。受貧子身。爲貧苦故。乃發大願云。我以夙業。受此苦報。若我今日不得見阿彌陀佛。生極樂國。成就一切功德者。縱令喪身。終不退息。誓已。七日七夜。專精憶念。便得心開。見阿彌陀

佛。相好光明。遍十方世界。我於佛前。親蒙授記。後至七十五而坐脫。竟生極樂。後以度生願重。再來此土。隨方顯化。或爲比丘。或爲居士。或爲國王。或爲臣宰。或爲女人。或爲屠丐。或隱或顯。或順或逆。皆隨順說法。導諸群品。又以仙道多未悟真常。耽長壽樂。不思進修。我現仙身。救其迷墜。如唐僖宗朝一事也。今則又爲汝等發明邪正。闡揚淨土。汝等當一意一心。堅修此門。必不相誤。若心志一堅。又不待隔世而生。現前亦得見佛。如

我昔年無異。有偈四句。

少說一句話 多念一句佛

打得念頭死 許汝法身活

◎或問。學人云何得離塵欲。得無障礙。菩薩曰。我將由小而推之大。由外而推之內。汝等當善解其義。有人於此。無故而奪汝一錢。動瞋恨否。答以一錢雖微。見奪則瞋。又無故而與汝一錢。生喜悅否。曰。一錢雖微。見與則喜。有答以一錢甚微。與何足喜。奪無可瞋者。菩薩

曰。汝能如是。心之清淨久矣。何至今日尚沈濁垢耶。汝等當知學人洗心不密。見有見無。處處是著。念念皆貪。所以業識紛馳。無暫停止。即念一句阿彌陀佛。心想依然外遊。未能頃刻歸一。良由汝等於無量劫來。未嘗發一時一日遠離塵欲之心。故此塵欲。亦從無始劫來。未嘗一時一日肯離汝心。身纏心縛。深入塵網。那得如蓮花出淤泥而不染。故知欲斷貪著。先從一錢之與奪。作棄捨觀。作非我有觀。奪不起瞋。與不起悅。如是乃至百千萬錢。乃

至億億萬錢。乃至國城妻子。乃至身肉骨髓。乃至過現未來心意意識。乃至生死業報菩提涅槃。一切皆如此一錢之與奪無異。自然習漏消亡。障緣永滅。漸履清淨。成就道品。汝等當依此修行。勿更自虞窒礙。

◎孟冬二日。爲菩薩誕生之辰。眾設供稱壽。菩薩曰。汝等以何物壽我。皆曰。心以爲供。菩薩曰。心是何物。可以持供。答曰。唯一至誠。本是無物。菩薩曰。既言無物。誰知至誠。能知誠者。定有處所。可得舉示。云

何無物。答曰。實無所得。菩薩曰。汝言無得。爲是暫無。爲決定無。眾擬議未對。菩薩曰。無則決定無。有則決定有。一涉纖疑。毫釐千里。當知汝等言誠言妄。說有道無。皆是起滅計較推詳卜度之心。以是祝我。均無所益。聽我妙偈。

至眞無二心 至眞無量心

心非一切心 一切性非心

除妄心不實 依真心強名

真妄兩不立 南無釋迦尊

了心無處所 方便福群生

◎時諸弟子咸再拜。願更聞法要。菩薩曰。善哉善哉。汝等願更聞法要。當誠解我語。善答我問。諸弟子。譬如有人。謂一人言。燕京帝王所都。富貴無比。是人聞言。有志往否。咸曰。願往。菩薩曰。汝不識路徑。當云何。咸曰。有人指示。從之而行。菩薩曰。不可。倘是人指以向南向東。若不明辨。竟從其言。則燕都遠之又遠。

矣。眾曰。然則如何。菩薩曰。畢竟得一走過燕都之人。
教是人曰。汝須向北而往。便可直達帝所。諸弟子。此人
所指。有錯謬否。咸稽首曰。無謬。菩薩曰。又譬如有
人。欲登萬仞之巔。九層之頂。當如何教之。咸曰。從卑
至高。菩薩曰。然。古云。千里之行。始於足下。須是從
第一級。至第二級。乃至最上一級。方爲正說。若云一步
便跨到最高處。爲浪語矣。又譬如有天子。將命以官。
詔是人曰。汝願爲宰相耶。小吏耶。是人云何上答。咸



曰。必願爲宰相。菩薩曰。然。又譬如有人。在於歧路。
不知所從。有憫之者。指曰。是邊極艱險。極曲折。不得
便出頭。是邊極正大。極平坦。走去便得出頭。其人受
指。於此兩邊。當走何路。咸曰。走正大。走平坦。菩薩
曰。善哉善哉。爾等酬我所問。俱合正理。然爾等能明解
我所喻否。咸再拜曰。唯垂開示。菩薩曰。善聽。爾等向
來雖有求道之心。而不識修行之要。趨向無據。如人欲往
燕都。而不知路徑者是。若遇邪師。教以邪法。如帝都在

北。而反指以往東向南者是。則其人雖終日行。而茫無歸宿。何由覲至尊。何由成大道。今我所示彌陀淨土。帝都也。信願行三。勤加精進。終至往生。是從第一級至最上一級也。期登上品。是願爲宰相。不願爲小吏也。依此而修。是走正大而不行邪曲也。我即走過燕都之人也。若爾等不能深信。是捨帝都而趨邊地也。棄宰相之尊。而就小吏之賤也。背正大而求艱僻也。萬仞之山巔。九層之塔頂。非爾所及矣。可勝悲痛哉。



◎眾欲積田爲修行計。菩薩曰。汝等欲矢志同學。久聚不散。謝絕世故。於衣食所從。不復爲求人計。故發此議。以我觀之。念頭雖好。然畢竟是貪戀塵勞。非清淨法。何以故。街頭一飯。塚間一宿。先佛道範。若必藉田而修。倘一不就。則汝諸人終無修行之日矣。又若言自無其貲。將出自募化。更爲不可。佛一代教。無此二字。蓋自末世不識禮義。不懼因果。不知廉恥之徒所爲。眞修道人。生死念切。斷斷不作是想。然更有一言。汝諸人但執



持正念。各各努力。是即不聚而聚。若身心散逸。事無常恆。是雖聚而實散。苟明此意。止應隨分隨時。莫去閒思預計。

◎菩薩又告眾曰。汝等慮身纏世網。念頭不得乾淨耶。我有一法。汝但發箇遠離求度之願。將牢牢歸向極樂世界見阿彌陀佛之心。換卻奔走利名之心。便能即塵勞而覺路矣。

◎有問念佛不能一心。當作何方便。菩薩曰。汝但息

想定慮。徐徐念去。要使聲合乎心。心隨乎聲。念久自得諸念澄清。心境絕照。證入念佛三昧。然平日必須多念。從千至萬。心無間斷。則根器最易成熟。若強之使一。終不一也。時達本於座下。忽欷然念數聲。菩薩曰。如是如是。

◎諸弟子欲造像供養。請示法相。菩薩曰。諸弟子欲造相供養。積誠已久。合當顯示。但汝塵勞中。我妙明內。即今顯現。汝等不能見也。又我隨機感化。身相不

一。今但從本起修。可畫作大比丘相。面如滿月。形體豐偉。著袈裟。坐蓮花上。左手置膝。右手作說法相。眉間放白毫光。光中有阿彌陀佛結跏趺坐。要須莊嚴相好。不得潦草。諸人聞已。皆拱立思惟如是法相。菩薩乃言。諸弟子。人人有箇覺明妙行。不即不離。在汝諸人摸索不著處。時時出現。即今明白。更不須設像供養。願見於他日也。

◎查定宏因喪子。欲棄家爲僧。菩薩曰。汝且莫妄想。

是事。是事汝做不得。汝但正心以治心。正身以治身。斷無益之事。絕無益之友。返心大覺。願出迷途。挹彼洪波。滋我燥土。精求加被。驅諸障緣。汝向來祈壽保身。當注力於此。勿多言也。定宏乃問奉教持《金剛經》。但諸字句有不同者。當從何本。得無差謬。菩薩曰。金剛般若波羅蜜七字。並無差謬。

◎沈天宇有疾。設供求示。菩薩曰。汝今有疾。尚未即死。當息諸牽累。安心端坐。念身無常。念世無常。所

有妄緣。一切放下。徐徐念一句阿彌陀佛。自然六塵不生。一心清淨。不唯癒汝今生之疾。即生死病根。亦從此拔出矣。汝今設供求示。不過望我有甚好方與汝。口訣傳汝。可癒汝疾。豈知菩薩無是等虛偽之法。但此實實數言教汝而已。汝若信而行之。真一服上品還丹妙藥也。付汝一偈。

病從己作 還由己除 攝心清淨 得常安樂
堅久不變 同無量壽

◎菩薩示達本曰。汝欲究明心地。極爲有志。但你一肚皮砂鉛水火。本來面目。眞空眞淨等話。實實塞卻。如何做得。你若要做。必須將此一絡索。拋向東洋大海始得。不然。枉卻用心。誤卻工夫矣。不如的的確確念一句阿彌陀佛。明心在是。生極樂在是。一舉而兩得。極是便宜也。

◎無朽問。云何仰酬祖父。菩薩曰。世間所謂孝者。以何爲上。曰。能敬養。能爲善。以無忘先德。菩薩曰。

此雖孝。而有限。惟能發大願。修出世法。若道成果滿。豈但福及九祖。即歷劫怨親。俱蒙解脫。汝能專修淨土。是爲大孝。

◎定茂問。持咒云何明心。云何究竟。菩薩曰。心不離咒。咒不離心。是持之義。汝當於一切時。觀此咒體與我心體。是一是二。若云二者。云何心能持咒。咒能顯心。若云一者。云何忘則咒無。憶則咒有。則知此咒與心。離諸名相。畢竟空寂。是名究竟。若但持而不究竟。

即無妙解。平等大慧云何顯發。平等大慧不現。何由照生死之昏迷。達三界之實際乎。

◎達本問。出聲念佛。每易發火。得默念否。菩薩曰。汝一念佛。便云火發。何故汝終日向人說話。便沒一毫火起耶。當知此火。乃汝無量劫來。無明煩惱之所積聚。由汝今日信之不眞。故念隨火起。火逐妄生。以燒汝法身慧命耳。昔牟尼世尊爲大法故。於無量劫。捨身求道。所以得成無上寶王。今汝年力已衰。日夕勤行。猶嫌

遲暮。尚乃戀著塵勞。希圖丹藥。以求延年益壽。汝不聞
非非想天尚有報盡。劫火洞燒。壞至三禪。況區區水火鉛
汞假緣和合之法。而求其永無變滅耶。汝今聞我所言。當
如夢初覺。如醉初醒。精修淨土。正念往生。彼世界之壽
命無窮無盡。成就法身。得一切智。非淺淺長生久視之術
可同日而論也。

◎查定宏問。持咒時。多生恐怖。求示方便。菩薩
曰。誰來怖汝。誰是受怖者。由汝夙生習氣不淨。故從微

想中忽現此相耳。汝但精誠誦持。自當除滅。得如意順善。能護伏煩惱。而造入玄微。何恐怖之有。

◎陳定育。爲母疾致禱。問作何功德。可獲痊癒。菩

薩示偈曰。

孝首萬德 孝貫三才 大哉孝行 人倫之師
汝以好心 求癒母疾 汝當安適 念母痛楚
汝食美味 念母減食 汝衣輕軟 念母膿血
污其衣襟 露其胸脅 如是思惟 夙夜靡處

歸命大聖 精誠不二 力行眾善 仰答四恩

願母福益 願母壽增 願母病癒 願母體康

覺明菩薩 爲汝依怙 苟如其言 無願不果

◎定茂欲捨持咒而念佛。請問。菩薩曰。汝欲捨持咒而念佛。一志專修。最妙。但汝未知法要。只可名爲持齋好善之人。不得名念佛之人。何以故。欲泛大海。必具大舟。欲馳千里。必擇良馬。故念佛人。先須具大手段。割絕牽纏。打開塵網。直下即念是佛。即佛是心。乃至離即

離非。頓入如來大光明藏。如是乃名正念念佛。得名爲念佛人也。汝應善解此義。

◎有年少僧四人進謁。菩薩曰。諸年少。眾生無始時來。因於恩愛。故成眷屬。而眷屬中父母於子。又爲恩之至重。愛之至切。難割難捨。今爾等出家離俗。得爲比丘。當知父母於爾。又有恩上之恩。非言所喻。故應趁此壯年盛力。勤辦道業。答父母最初割恩斷愛一片苦心。方不愧出家兩字。若復放逸懈怠。以致終身廢墜。是不孝中

之不孝。爲天地間極重罪人矣。當因吾語。猛生痛念。

◎菩薩又示眾曰。諸善男子。人之一身。父母所生。

父母所育。現前爾等種種營謀。種種受用。即使父母不曾
與得一錢。也還是父母生卻你身。故有今日。萬事身爲
大。身爲本。從本而推。豈不是父母之恩難言難盡。所以
佛言。於父母邊出一高聲重語。尚獲罪無量。況今有甚於
此者耶。若言父母或以不堪相加。不得不諍。則是視父母
如路人矣。只可歡然順受。父母自有感悟之日。決不得爭

箇你非我是。做逆天背倫之人。（按先儒謂弑逆之人。只因見父母有不是處。蓋小不平則小計較。大不平則大計較。積漸所至。勢固然也。然則人子日用尋常之事。有與父母計較短長之心。便已陰在弑逆路上著腳矣。可不畏哉。）

◎菩薩曰。諸弟子。當知十方諸佛是眾生心。十方眾生是諸佛心。是故憶念佛念佛。則十方諸佛現汝心內。然亦非諸佛之入於爾心。亦非汝心出於諸佛。皆是覺妙本明不

不可思議。

◎菩薩曰。心行處滅。是諸佛常住真心。心行處有。

是眾生生死業心。其間不容絲髮。若汝等能綿密加工。使此心無些子空隙。方得幾分相應。莫略做半年十月。便謂我能苦心修道。不知此正障道處。切宜慎之。又工夫雖加。若未到銅山鐵壁。推不倒移不動處。猶未是打成一片。切莫見些影響。便即歇手。是爲半途而廢。必至棄其前功。毫無所益。此又學道人大病。不可不知。要知佛法

如大海。轉入轉深。斷非小小知見之所能盡。應盡形修習。造極爲則。切莫作容易想。

◎菩薩曰。念佛三昧。是汝心大勢力之所成。非由他致。今爾等念佛。晝夜不能如一。亂想猶復間眞。皆是用心不得力處。

◎顧定成求教。菩薩曰。汝來此庵。欲修淨業。可知道云何得生極樂。答曰。念佛往生。菩薩曰。汝知云何念佛。即得往生。曰。執持名號。一心不亂。菩薩曰。如何

是一心不亂。定成不能對。菩薩曰。吾知汝第能言之。未必能如法行之也。汝諦聽我語。善男子。心本無念。念遂想生。此想虛妄。流轉生死。汝今當知。此一句阿彌陀佛。不從想生。不從念有。不住內外。無有相貌。即是盡諸妄想。諸佛如來清淨微妙真實之身。非一非二。不可分別。如是念者。煩惱塵勞。無斷無縛。止是一心。必得一心。方得名爲執持名號。方得名爲一心不亂。淨業功成。直趨上品。定成再拜曰。濁世凡夫。心智淺劣。未能深達。

至理。更求詳示。菩薩曰。汝今當發大願。願生極樂。然後至誠懇惻。稱於阿彌陀佛。必使聲緣於心。心緣於聲。

聲心相依。如貓捕鼠。久久不失。則入正憶念三昧。更欲上進。當廣參知識。博詢高明。自悟即心是佛妙諦。汝今當具深信。慎毋學彼庸流。聞而不受。更莫學彼半真半假半疑半信之徒。名雖受。而無誠心奉行也。

◎菩薩謂查母曰。汝何不勤勤念佛。答曰。因添兒孫。時常抱持。恐有不淨。菩薩曰。汝謂不淨念佛。恐怕

有罪。不知不念佛。則獲罪無量。莫計淨與不淨。只管念去可也。

◎陳永壽問結局。菩薩示偈曰。

節慾戒瞋 是保身法
隨力婚嫁 是省事法
收斂安靜 是作家法
行善念佛 是出世法
守此四法 結局通達

◎顧善記問終身。及行善之方。菩薩曰。汝若存正心。行正事。得箇正終身。你若存邪心。行邪事。還你箇

邪終身。至於善之一字。隨時隨地可行。大事小事皆是。

又兼戒殺放生。隨力捨貧施苦。持念阿彌陀佛。迴向極樂。日日不間。如是三年不改。方許你好心行善四字。

◎菩薩示無朽曰。大抵修淨業人。行住坐臥。起居飲食。俱宜西向。則機感易成。根境易熟。室中止供一佛一經一爐一桌一床一椅。不得放一多餘物件。庭中亦掃除潔淨。使經行無礙。要使此心一絲不掛。萬慮俱忘。空洞洞地。不知有身。不知有世。並不知我今日所作是修行之

事。如是則與道日親。與世日隔。可以趨向淨業。蓋汝平時能將一切拋得乾淨。念頭上不存一些子根節。大限到來。洒洒落落。不作兒女子顧戀身家子孫之態。豈不是大丈夫舉動。所以要汝一意修行。別無沾滯。正爲此一大關目也。至於修淨之法。不出專勤二字。專則不別爲一事。勤則不虛棄一時。汝今晨起。即誦《彌陀經》一卷。持阿彌陀佛一千聲。向佛前迴向。念「一心歸命文」。以此文言簡而意備也。此爲一時之課。若初起。或身心未寧。日

止四時。稍寧。漸增至六時。又漸增至十二時。合經十二卷。佛名一萬二千聲。更於迴向時。禮佛百拜。亦可分作四時。此爲每日常課。餘工不必計數。或默或聲。但攝心諦念而已。又持名之法。必要字字句句。聲心相依。不雜分毫世念。久久成熟。決定得生極樂。坐寶蓮花。登不退地。若餘年未盡。猶得以其所證。爲四眾向導。報佛深恩。汝若於我所說。一一遵依。方不負覺明菩薩示汝正道。令汝出家。方不負三昧和尚爲汝剃度。授汝大戒。此

非小小因緣。汝莫自生輕慢。慎之慎之。

◎菩薩示常攝曰。汝向持大悲神咒。祈觀音冥加。速得入道。甚好。但不得一向延緩。使志事不立。要須並日而作。兼程而進。自今當刻定期限。約準數時。杜絕人事。安止一室。每咒百卷作一時。兼禮四明所立懺法一卷。懺諸業障。助發勝功。爲一時。晝夜分爲六時。以五時持咒。一時禮懺。餘時安坐修禪。深入不思議慧。何言乎不思議慧。了知心外無法。法法無名。直下纖塵不立。一念

圓融。不可以思思。不可以議議。故名不思議慧。依此妙慧。則心攝於微。攝無攝相。所謂攝無所攝。而不礙於攝。名善攝心也。由心攝故。無事不辦。總而言之。無時無在而不心心流入。爲持咒攝心之本。自然夙障冰消。定心朗現。或得三昧開發。契本妙心。庶無虛糜歲月。可以刻期進道。不然。今日明朝。來年後月。若作不作。欲前不前。保汝百年後。仍自目前行止。斷不能移易寸步也。

慎之。勉之。

◎菩薩又示常攝曰。只強順人情勉就世故八箇字。誤卻你一生大事。在今日。決不是牽郎拽弟打哄過日之時矣。道業未成。無常至速。急宜斂跡韜光。一心向道。不得再誤。

◎達本奉教出家。菩薩示曰。汝老年出家。不得泛學餘事。但誦《彌陀經》。日課佛名一萬二千。自少至多。真真切切。求生極樂。此是一了百當之法。莫學世俗愚流。高談闊論。說性說心。見人念佛。便一概抹去。及叩

其所行。不及三家村裡一箇不識字的漢子。十字街頭一箇念《三官經》的乞兒。枉使擲卻光陰。誤卻大事。因汝平日喜說禪。而不達要妙。又未必能深信淨土。老實念佛。故發此論。

◎菩薩又示無朽曰。《彌陀經》十二卷。佛名一萬二千。不要增。不要減。只依著我行去。但經要勻勻淨淨。不緩不急。不疾不徐。佛要聲聲心心。不澁不掉。不浮不沉。念去。至於迴向。不是但誦舊文一過。須從自己心中發

出真正大菩提願。至誠懇切。普願一切眾生同生極樂。而我心無所著。如虛空等。是名迴向。又靜坐時。當反觀深究。佛即我心。是心是佛。不假外求。如心而住。無能無所。如是諦觀。更無二念。是名修行三昧。慎勿忘形死心。又落外魔知見。如是坐一時。便起經行。又更持誦。有箇次序。若忙忙促促。一氣趕去。謂可完卻一日課誦。便有苟且了局之念。非真正修行矣。大抵學道人。不遵知識明誨。決定勞而無益。未久必敗。慎之慎之。又諸經中

所談淨土依正莊嚴。須講誦明白。倘坐中。或經行。或禮誦時。淨土現前。便可覺了。不爲異境所惑。

◎菩薩示陳大心曰。爾道念增矣。世念亦不減。凡世間一切人我相。名利相。瞋喜相等。不但在身上行出來。始爲牽連塵網。但心上略帶些子。即屬障道因緣。爾須要明白。爾但身禮阿彌陀。口誦阿彌陀。心念阿彌陀。不涉分毫別想。使得洗滌乾淨。打破塵網。生極樂國。爾須要明白。

◎或問終身。菩薩曰。汝問終身耶。我這裡沒有斷終身的法。爲因菩薩歷劫修行。不曾學得這事。然汝亦太愚痴。終身便不過如此。問他何益。汝何不問頭兒白了。面兒皺了。身子軟了。無常將次到了。閻羅大王面前。如何抵對他一言半句。免得披枷帶鎖去。這事汝何不問問。

◎僧法緣。將結期禮「彌陀懺」。先來求示。菩薩曰。「彌陀懺」是近代慈雲懺主所集。亦具事理一心。事一心。專於一事。若四相不生。湛若虛空。名理一心。此

一心難到。外則勤修懺法。以除夙障。內則依理修觀。馴致一心。既得一心。何患不能入道。汝今在期。莫管爲自己。爲施主。亦莫管長久不長久。只要掃除習氣。打蕩身心。不成三昧。誓不休息。便了。又汝在彼。雖然次第。但不是箇修行地面。若真正要修行。將萬緣放下。一鉢依於十方。一身依於大地。眞真切切。求度生死。乃爲正修行法。若區區三載懺期。又夾雜世故。而欲成淨業。出生死。譬如吸風吞霧。而求飽足。世上必無之事。汝莫作此。

太愚痴想。以致凍餒而死也。

◎王師初下三吳。湖寇突發。闔城奔竄。久之事定。

稍稍復集。菩薩示曰。後六月十三之變。得無驚恐耶。汝等當知。此皆無始劫來。不能修善。廣造惡業。所以生生世世。不離此禍。如梁武皇時。八人以兵亂各散。今日又遭兵變。逃竄無地。可見眾生不能超三有。獲無生。畢竟因緣業報。分寸難免。汝等幸而不死。亦大險矣。三世業果。可驚可怖。汝等尚不一心辦道。早出苦輪。隔世他

生。正未了在。奈何奈何。

◎菩薩示沈元輝曰。大凡修淨土人。最忌是夾雜。何謂夾雜。即是又諷經。又持咒。又做會。又好說些沒要緊的禪。又要談些吉凶禍福見神見鬼的話。卻是夾雜也。既夾雜。則心不專一。心不專一。則見佛往生難矣。卻不空費了一生的事。你如今一概莫做。只緊緊持一句阿彌陀佛。期生極樂。日久功成。方不錯卻。當授汝一偈。依而行之。

阿彌陀一句 萬法之總持

聲與心相依 念茲復在茲

感應不思議 蓮開七寶池

◎菩薩示定愷曰。汝既遭大難。幸而得免。自今當痛
思前過。斷其後愆。更無躁心競氣。逞志使能。貽厥身
災。今爲汝立名曰愷。愷者何。慈也。仁也。慈以立身。
仁以及物。功名得不足喜。失不足憂。惟務培育善心。堅
固善行。以仰答四恩而已。

◎一時菩薩降臨法會。士庶三十餘人。未決心疑。咸來咨請。菩薩憫茲眾等。雖同稟誠心。而不識修行正路。乃垂示曰。今日之會。可謂有緣。但若與爾等說佛法。非所習聞。恐難信入。不若舉一則世典儒書。與眾等一話。或能信得一句兩句。《中庸》說。或安而行之。或利而行之。或勉強而行之。今日看來。安與利且莫說起。即勉強而行者。亦不可得。即如爾等自遇我之後。亦曾發心。勉強爲善。乃有一旦棄捐。或漸至懈廢者。其故何在。只是

將善之一字。看得太緩。謂行善無功。不如爲惡之有效耳。不知爲善若果無功。何以古來聖賢之徒斷不作些微小惡。善則盡力盡心。必要做到十二分滿足。若果爲惡有效。又何故古來仁人君子不惟有效是求。反作無功之事。且現見爲惡之人。眼前雖得便宜。到頭幾箇有好結局。好斷送。好名聲。好子孫以延其世代。又如世間數歲小兒。見說箇好人。便知讚美。豈不是爲善有大利處。見說箇惡人。便要瞋怪。豈不是爲惡無大利處。此事極易曉。非是

爾等不聰明。真不知得。但是不能實心向善。故一時不細察耳。所以平日間捨一錢。也要向人說一遍。有句好話。

也要向人說一遍。都是從外邊做手腳。全不體會大聖大賢用心切己處。覺得沒滋味。便拋棄了。汝等今日。若果將真真實實的心。行真真實實的事。無一毫妄想覬覦於其間。坦坦然樂天知命。守其在我。不見有終身可祈。結局可問。五行八字之窮通可卜。吉凶得失之可得而趨避。自然無禍不消。無福不至。道與時增。德與歲積。成聖成賢

無難矣。此爾將來一定的實事。所以說及其成功一也。反此。則生爲無忌憚之小人。死爲腐爛之草木。可不痛哉。

菩薩說是語已。默然而住。時眾猶顚顚有待。更有再拜而致禱者。菩薩曰。甚哉爾眾之愚也。聞如是言。竟不生希取之心。反顧之念。只要將胸中兒女身家之事。一問而後已。苦哉苦哉。然菩薩大慈無已。當更說些古話。醒豁爾等痴夢。

一者。學道之士。情不正。性則離。心不堅。德乃

闕。往往慎於斯須。而變於頃刻。若是者。謂之造就無地之流。難以入道。非聖人之誨人或倦。而故絕之也。眾中有識者思之。

一者。天下又儘有聰明向上之士。卻爲自是之見所障。不成大器。蓋人一自是。決不肯虛心就正有道。其平日所交所接。定是一等庸下之徒。互相稱譽。凡有所爲。不能面聞其過。而德業殆矣。眾中有識者思之。

一者。世人貪得。都務強求。不知一錢之獲。尚有命

焉。而況功名富貴之大。曰。吾智力可求。若然。則蒼蒼者天。赫赫者神。將無用乎。即使強求而得。亦是命數合有。不因爾用。卻許多齷齪心機。天憫而與之也。然則勉強而求者。有辱無榮。有失無得。有戮身之禍。無利物之功。有損德之災。無進善之福。天厭之。神棄之矣。眾中有識者思之。

一者。天下大恩。莫過父母。父母而在。堂前活佛也。父母而沒。猶可追報也。試思此身。從何而來。何由

而長。乃不能反本尋源。盡心盡力。敬事承順。而至有結怨於父母而不顧。自利其妻子而不養。更甚至有病而不知。死而不葬。或一言亦報復如平人者。是皆禽獸所不若也。嗚呼。人而禽獸不若耶。可畏哉。眾中有識者思之。

◎或欲求官。問可得否。菩薩曰。做官一事。你更莫想。你須知得。通經史之謂文。練韜略之謂武。膂力過人之謂勇。智能出眾之謂才。汝自思量。有一於此否。若四中不具其一。要做官。不過圖僥倖而已。要圖僥倖。念頭

先已不正。一做了官。便去假威仗勢。一味虐疲民而飽我腹。決不思爲國爲民做些好事。以至積惡日深。不知改悔。來世定作牛馬駝驃有力報人等畜。如目前兵戈戰陣中一類畜生。皆夙世冒祿貪功。無一毫功德於天下之徒也。且報應之理。遠近無期。或致禍於現世。或殃及於子孫。如目前一等罪犯囹圄。身受屠戮。繼嗣不肖。或絕滅無傳者是也。又損害良民。而取其財貨。謂之不仁不義之物。以之祀祖先。而祖先益愆。事神明。而神明加怒。供諸佛。

聖賢。必爲之墮淚。奉仁人有道。反爲之生慚。即罪惡不極。而怨結相酬。後世定作一類羊豬雞犬無力報人之畜。及世間一等貧窮下賤劇苦之人。又此圖僥倖一輩。在官即做些好事。亦未免公中有私。善中有惡。罪福影響。不漏絲毫。貪有限之榮名。受累生之惡果。僥倖做官。溺心利欲。如上所談。勢所必至。可不畏哉。

◎王定佑求子。菩薩曰。汝自今莫殺生命。勿食異物。勿多慾逞忿。何以故。殺生傷天地之慈。乖長養之

道。食異物必增淫穢。或致惡疾。多慾逞忿則戕損壽命。
暴折元和。又多犯陰陽之忌。汝當永戒此三。一意奉養老
母。推惠行慈。濟貧拔苦。廣行陰德。積累不廢。天必錫
汝佳胤也。

◎菩薩示陸定息偈曰。

親近老成 莫狎惡少 君子上達 汝曹當效
勸母修行 是爲大孝 必誠必敬 遵菩薩教

復示曰。回去向爾母親。諄諄切切。勸他至心念佛。

求生極樂。即不能素食。莫勉強他。但不可殺生。他若肯歸向彌陀。自斷血肉。此是世間第一等孝行。汝宜勉之。

◎爾時菩薩化緣已終。因遍召諸弟子。各授以訓。示定勉曰。汝名定勉。當號自開。勉力修行。自得開悟無上菩提。作善知識。續佛慧命。汝毋自棄。

◎定開問一心三觀之旨。菩薩曰。台宗三觀。妙在圓心。圓心若知。其道盡矣。令與定勉並立。付偈曰。

一開二開 今日重來 菩提有種 妙手雙裁

◎示上德曰。

頭既禿 當知足 念無常 斷愛欲

南無阿彌陀 念念恆相續

◎示耳之曰。

勤則不病 不勤則病 勿謂夙業 其報甚近

慈父彌陀 數數親覲 可以永年 況乃卻病

◎示陳大心曰。

老不撇脫 死定兜搭 兒女債完 可以怡悅



極樂非遙 勿自隔絕

◎示沈元輝曰。

深潛不露 是名持戒 若浮而外 未久必敗
念既不眞 不得自在 褐福吉凶 汝自作怪

◎示杜義見曰。

善則爲義 不善不義 義善無二 所見唯義
以義爲見 不見非義 見非義時 見無見義
◎示女弟子意安曰。汝因病不念佛耶。噫。病愈甚。

念愈勤。乃好也。若病到念不得的時節。卻是錯了也。

◎示無朽曰。

尺璧豈寶 寸陰當惜 正念彌陀 信光赫奕

莫貪舊遊 前途永失

◎示常攝曰。

有口若啞 有耳若聾 絶群離俗 其道乃崇

◎示常源曰。

汝行勿急 急非比丘 彼自廢者 多身後憂

◎示定茂曰。

汝是道人 當淨其心 能淨心者 可以超群

◎示定隨曰。

老實是寶 又有不好 若只如此 止堪溫飽
何用出家 願離痴惱 當發道意 莫空過了

◎示查定宏曰。

菩薩說偈 家常茶飯 歸告汝母 已事早辦

◎示陳定嵩曰。

惟天最高 無所不見 護汝初心 慎勿少變

◎示達本曰。

達本無本 萬緣應息 胡不寧處 猶是汲汲
一朝撒手 男耕女織 回想生前 汝自哭泣

◎時菩薩一一示已。復告諸人曰。我自降此以來。凡所言說。皆修行要妙。汝等能時時體會。極力遵行。決生上品。菩薩從此不復再來矣。諸弟子宜各努力。勿虛此會。時諸弟子聞菩薩語。皆涕泣悲戀。不能仰視。菩薩謂

曰。諸弟子。汝等謂菩薩不復再降。恐生懈怠。從此失足。然實不爾。何以故。從是以後。汝等精進。只是自己精進。捨塵塗而登聖域。大智大賢之所爲也。若懈怠。亦是自己懈怠。背大道而入淤泥。無知下愚之所爲也。諸弟子。但須前進。莫生係戀。但急著力。無事悲哀。頃之。復諭曰。汝等不得更作菩薩再降想。所以者何。鸞乩之設。本爲神鬼所依憑。非大菩薩應化常事。汝等若奉教無失。於菩薩生恭敬之心。難遭之想。即是大報恩處。時諸

弟子雖聞法諭。猶故圍繞不忍散去。菩薩又諭曰。諸弟子。菩薩往昔因中。與汝等具有大緣。從此雖不再降。然不得作遠離想。當知覺明妙行時時在汝等眼前相逐不捨。汝等慎無一日廢弛。自捨卻覺明妙行也。少頃。又諭曰。諸弟子。法會既終。宜各散去。菩薩來無所從。去無所至。莫只呆呆守著。菩薩定不在一幅紙兒上也。各念一句南無阿彌陀佛。至誠作禮。頂戴奉行可矣。

西方確指 終

註：

一、清康熙丁未年：西元一六六七年。雪山和尚示金鍔西方
確指一書。（序第三頁）

二、明崇禎癸未年迄清順治丁亥年：西元一六四年迄西元
一六四七年。自菩薩初降法會迄臨行止，計四年餘，共
二十四會。其間於一六四五五年，清兵陷陽州，屠城十
日，殺八十萬人，又陷江陵，殺十三萬人。吳城爲今蘇
州，位於江陵下方，濱臨太湖，書中言王師（清兵）下

三吳，湖寇突發，逃竄無地，約在此時。（序第四頁）
三、清康熙己酉年：西元一六六九年。金鐸作序文。（序第六頁）

四、唐玄宗開元六年：西元七一八年。菩薩親見洛陽微行禪師，祈長壽事。（正文第九頁）

五、梁武皇天監六年：西元五〇七年。菩薩出家北魏東都淨因寺，弟子八人曾依菩薩修學。（正文第十八頁）

六、唐僖宗朝：西元八七四年至八八年。時值唐末藩鎮割據，黃巢起兵，天下大亂；菩薩爲清河獻王長子，棄位

出家，開導弟子八人念佛法門，迄至清初法會期間，約八百年。（正文第十九頁）

七、東晉明帝：西元三二三年至三二六年。菩薩受貧子身，發大願七日七夜，專精憶念，使得心開見佛，壽七十五歲，往生極樂。（正文第二十五頁）



西方確指 後序

古先聖人。去今遠矣。然讀其書。知其言決不可以僞爲者。斷之於理而已矣。佛法入中國千五百年。其間豪傑明睿之士。得一經一偈。決定信入。了脫生死者。殆不可悉數。而淺智之流。輒以私意窺之。謂其原出於老莊。乃其徒所僞作。即今老莊書具在。試取而與《楞嚴》《圓覺》諸經絜之。其淺深離合之故。略可見矣。老莊所不能爲。而謂學老莊者能爲之乎。此不能察理。而自徇其私者之過也。近世

飛鸞之化行。三教聖賢往往隨方應感。宏法度人。是皆出於不得已之心。讀其書。知其言決不可以偽爲者。亦斷之於理而已矣。西方確指者。極樂界中。覺明妙行菩薩所說法也。

其爲教。貶斥邪修。指歸淨土。闡一心之妙諦。窮向上之玄關。誠學佛者之指南也。予反覆讀之。作而歎曰。嗟夫。蓮花國土。不離當處。阿彌陀佛。全體眾生。奈此眾生日用不知。未曾發一念迴向心。從迷入迷。漂流長劫。可不哀哉。菩薩悲願深重。與此眾生世世隨逐。不相捨離。飛鸞之化。

與現身說法何異。讀是書者。誠能信自本心。如說修行。心
心迴向。無諸異念。念極情空。脫然無住。雖現居五濁惡
世。已渾身坐在蓮花國裡。報緣一謝。彈指往生。是果是
因。初無先後。如其不信自心。因而不信淨土。甚者或疑此
書爲僞作。則吾末如之何也矣。是書得之友人王貫三。向有
刻板。頃燬於火。吾黨諸賢。將復刻以行世。予謹爲訂其章
句。次其先後。既成而爲之敘如此。

乾隆三十八年秋八月東林後學彭紹升撰

《西方確指》用字對照表

依據版本用字 ↓ 常用字

17.	15.	13.	11.	9.	7.	5.	3.	1.
鉢	華	并	猫	勾	徧	裏	澁	羣
↓	↓	↓	↓	↓	↓	↓	↓	↓
鉢	花	並	貓	丐	遍	裡	澀	群
18.	16.	14.	12.	10.	8.	6.	4.	2.
舍	迹	鑪	回向	全愈	于	癡	邱	呪
↓	↓	↓	↓	↓	↓	↓	↓	↓
捨	跡	爐	迴向	痊癒	於	痴	丘	咒

聲明啓事

淨空法師所有一切著述、錄音帶、錄影帶、光碟、雷射等出版物，暨四衆同修整理文物書刊，公開授權大眾翻印流通、播放，但不得擅自加註版權所有，任意增減內容，非法牟利。侵害公眾權益及原著本意。如有故違，將予追究。

願以此功德
莊嚴佛淨土
上報四重恩
下濟三途苦
若有人聞者
悉發菩提心
盡此一報身
同生極樂國

This book is for free distribution. It is not for sale. Printed in Taiwan.

西方確指

公元二〇一二年六月 恭印參仟冊

出版者：華藏淨宗學會

地址：台北市大安區信義路四段三三三之一號二樓

電話！（〇二）二七五四一七一七八

傳
真
世
（一〇二）二七五四—七二六三

畫樣帽號
一九三九年七月

戶名十社團法人中華華藏淨宗學會


E-mail : mwazam@mwaazam.in (請法寶專用)

www.anth.tw

淨空法師
影音網址
www.dntb.cn
www.chinkung.org

www.hwadzan.tw

承印者・和裕出版社(〇六)二四五四〇二三一七



華藏淨宗學會

THE CORPORATION
REPUBLIC OF HWA DZAN SOCIETY

本會一切法寶，免費結緣，禁止販售，請勿擅改內容，歡迎翻印流通。

This book is for free distribution. It is not for sale.

Printed in Taiwan